

အဝိကဝိက

AWIG AWIG

၇သကအသဟပိသဟ

DESA ADAT PECATU



၇သကအသဟပိသဟ

DESA ADAT PECATU

၇သဟပိသဟ-ဆိသဟဟန္တဗျာ-ဆသုပ၇ဟဆန္တဗျာ

DESA PECATU KECAMATAN KUTA-KABUPATEN BADUNG

ကကဆ၇မ၇ကမံမံ

TAHUN MASEHI 1987

SARGA I.
ARAN LAN WEWIDANGAN DESA.

Pawos 1.

(1) Desa adat puniki mawasta Desa Adat Pecatu.

(2) Jebar kekuuban wewidangannia mawates nyatur :

1. Ring sisi lor : Desa Adat Jimbaran.
2. Ring sisi wetan : Desa Adat Ungasan.
3. Ring sisi kidul : Segara Indonesia.
4. Ring sisi kulon : Segara Indonesia.

Wates wewidangan desa adat puniki kajangkepin antuk gambaran Desa Adat Pecatu sakadi munggah ring lepihan panampih (lepihan) awig-awig puniki.

(3) Jebar inucap malinggah 2.674 hektar tur kawangun dados :

1. Karang desa lan PKD : 10,000 hektar.
2. Tanah setra : 1,380 hektar.
3. Tanah bukit Pura Kahyangan Tiga : 0,875 hektar.
4. Tanah bukit Pura Bangbang Kembar : 1,505 hektar.
5. Tanah genah gedung sekolah dasar : 0,800 hektar.
6. Tanah laba Pura Luhur Uluwatu : 147,070 hektar.
7. Tanah negara : 128,360 hektar.
8. Tanah pedi (hak milik) : 2.384,010 hektar.

(4) Wewidangan Desa Adat Pecatu, kepah dados tigang banjar adat makadi :

1. Adat Banjar Kangin.
2. Adat Banjar Tengah
3. Adat Banjar Kauh.

(5) Wewidangan banjar adat kepah malih dados makudang-kudang tempekan :

1. Adat Banjar Kanginan dados 6 (enem) tempek :

- ha. Tempekan Tambiak.
- na. Tempekan Giri Sari.
- ca. Tempekan Bangbang Kembar.
- ra. Tempekan Selonding.
- ka. Tempekan Pagpagan.
- da. Tempekan Lalangambu.

2. Adat Banjar Tengah dados 6 (enem) tempek :

- ha. Tempekan Ana.
- na. Tempekan Temu.
- ca. Tempekan Puluk-puluk.
- ra. Tempekan Bustegeh.
- ka. Tempekan Song Bintang.
- da. Tempekan Kulat.

3. Adat Banjar Kauh dados 7 (pitung) tempek :

- ha. Tempekan Dauh Puseh.
- na. Tempekan Umpeng.
- ca. Tempekan Labuansait.
- ra. Tempekan Bangket Kangin.
- ka. Tempekan Bingin.
- da. Tempekan Pande.
- ta. Tempekan Kesambi Kembar.

SARGA II.

PATITIS LAN PAMIKUKUH.

Pawos 2.

- (1) Desa Adat Pecatu puniki ngamanggehang pamikukuh :
1. Pancasila makadi munggah ring purwakaning UUD 1945.
 2. Undang – Undang Dasar 1945 pamekas Pasal 18.
 3. Tri Hita Karana manut tatwaning Bhuwana Agung.

Pawos 3.

- (1) Luir petitis Desa Adat Pecatu :
1. Mikukuhin miwah ngrajegang Sang Hyang Agama.
 2. Nginggilang tata prawerti Agama.
 3. Ngrajegang sukertan desa saha pawongannia sekala kalawan niskala.

SARGA III.

SUKERTA TATA PAKRAMAN

Palet 1.

Indik Krama

Pawos 4.

- (1) Sane kabawos krama desa inggih punika kulawarga sane magama Hindu, ngemong karang tegal padidi apalebahan utawi krama sane magenah mungguh sajeroning Desa Adat Pecatu.
- (2) Sajaba punika sinanggeh tamiu, turmaning linggihnyane wenten kalih soroh :
1. Sane magama Hindu, menawita :
ha. Ngrauhin kulawarga ring Desa Adat Pecatu arep mawirasa/ngaturang bakti Kahyangan Desa.

na. Ngrereh pangupa jiwa turmaning jenek sasihan patut :

na.1. Sajeroning awuku masadok ring Prajuru Desa Adat lan Dinas antuk ilikita pastika.

Na.2. Keni sadana krama manut petangan soang-soang banjar.

Na.3. Katedunang makrama banjar / desa manut petangan soang-soang banjar.

Na.4. Sang katedunang makrama banjar / desa keni batu-batu manut parerem.

2. Sewosan ring sane magama Hindu menawita :

ha. Mawirasa muah ngrereh pangupa jiwa, patut sajeroning awuku masadok ring prajuru adat lan dinas, saha keni sadana krama nyabran sasih manut petangan banjar soang-soang.

na. Sang pecak keni ayah suka duka.

Pawos 5.

Krama desa, banjar wenten 3 (tigang) soroh :

(1) Krama ngarep inggih punika krama sane sampun mawiwaha tur sampun katedunang makrama banjar / tempekan kasinaksiang antuk parajuru banjarnia soang-soang.

(2) Krama balu inggih punika sane sampun mawiwaha nanging silih sinunggil sampun lina :

1. Balu nglisting, krama balu sane nenten madrebe putra utawi sameton nanging ngawa karang / warisan.

2. Balu ngempu, luire krama balu sane madue putra nanging dereng mayusa 17 (pitulas) warsa.

3. Balu makrambian, luire krama balu sane madrue putra nanging wenten sane maparabian diastun sampun mayusa 17 (pitulas) warsa.

- (3) Krama pangele inggih punika jadma sane madunungan netep ring krama ngarep utawi magenah netep ring palemahan Desa Adat Pecatu.

Pawos 6.

Kawit dados krama desa / banjar wenten 3 (tigang) soroh :

- (1) Mawiwit negakin tanah apalemahan.
- (2) Mawiwit jumenek maumah wiadin ngrereh pangupa jiwa sajeroning palemahan Desa Adat Pecatu.
- (3) Malarapan antuk pawiwahan pratisentana manut tata cara agama Hindu wiwit (1) miwah wiwit (2) ring ajeng.

Pawos 7.

Panumaya tedun makrama desa :

- (1) Malarapan antuk pawiwahan risampun katedunang makrama banjar.
- (2) Malarapan antuk ngrereh pangupa jiwa / karya saha jenek risampun katedunang makrama banjar.
- (3) Malarapan patilar rahayu saking warga desa sewosan patut makrama desa risampun atur upeksa ring prajuru Desa Adat Pecatu.

Pawos 8.

Sahanan warga desa keni ayah-ayahan sakadi ring sor :

- (1) Ayah ngarep sakeng krama ngarep.
- (2) Ayah balu sakeng krama balu.
- (3) Ayah rob-roban sakeng krama dandanan waris wiwit (1) miwah (2) ring ajeng, sane sampun munggah deha teruna sane mayusa sakirang ipun 17 (pitulas) warsa.

Pawos 9.

Tetegenan krama desa adat sakadi ring sor :

- (1) Patut satinut ring sadaging awig-awig, pasuara sahanan pararem desa.
- (2) Krama ngarep keni ayah miwah pepeson sajangkepnyane (sawungkul).
- (3) Krama balu keni ayah miwah pepeson kadi ring sor :
 1. Balu nglisting ngawa karang keni manut ring pararem.
 2. Balu ngempu keni saparo jangkep.
 3. Balu makrambean yening sampun ayah jangkep keni sawungkul.
- (4) Krama pangele keni ayah lan papeson manut pararem.

Pawos 10.

- (1) Swadharmaning krama desa / banjar sewosan ring ayah-ayahan luire :
 1. Dudu atuang ring desa.
 2. Tinut saguluk ring sasadaging awig-awig, pasuara.
 3. Miwah pararem-pararem desa.
 4. Tan maren ngutsahayang mangda auban desane prasida nyujur manut petitis.
- (2) Krama banjar utawi krama sane madrebe auban kengin makarya awig-awig (pararem) sakewanten mangda tan piwal ring sadaging awig-awig Desa Adat Pecatu.
- (3) Swadharmaning tamiu sakadi ring sor :
 1. Tinut ring tetiwak desane ngupadi sukerta sekala.
 2. Tan wenten tungkas ring sapamargin sukertan desane.

Pawos 11.

Patias (olih-olihan) krama desa / banjar sekadi ring sor :

- (1) Polih pasayuban, parajuru ngamanggehang luih petitis, tur kabawosin saha katiwakin pamutus sahanan wicarania.
- (2) Wenang nyarengin paruman desa / banjar saha wenang mastikayang pamutus.

(3) Kengin mapuankid / matur piuning, nyada nyuksukin, luput, mogpog muang manut petangan :

1. Mapuankid ngluputin ayah-ayahan desa / banjar menawita mayajnya, matepetin miwah ngalunganin / maleluasan.
2. Nyada : ngamademang ayah-ayahan / pepeson riantuk sampun wenten panyade utawi lanjut yusa (masengker 60 warsa) wiadin nunas ngraga / sakit-sakitan.
3. Nyada nyledihi (nyuksukin) ayah, tur sane kadadosang risampun nunggal daha taruna, mogpog, ngetut ayah saha pepeson.

Pawos 12.

Mungguing pamidanda sane katiwakang ring sor :

- (1) Sahanan warga desa sane piwal ring sadaging awig-awig tan prasida ngentosin solah maprawerti, risampun kaparituduh oleh prajuru patut kasepekang, gumanti sang inucap eling ring raga tur nunas pangampura indik kaiwangania ring Prajuru maduluran antuk prajati ring Khayangan Tiga.
- (2) Risampun mrayascitain dewek, prajuru kapatutang ngruwak sakadi mungguh ring (1), inucap saha nyiarang ding krama desa.

Pawos 13.

(1) Wusan dados krama desa / banjar sakadi ring sor :

1. Sangkaning magingsir genah saking wewidangan Desa Adat Pecatu, kadulurin antuk nunas ilikitan Prajuru.
2. Kawusang antuk Banjarnia.

Palet 2.

Indik Prajuru.

Pawos 14.

- (1) Desa Adat Pecatu kaenter olih Kelian Desa Adat kasarengin olih :
 1. Pangliman / Wakil Kelian Desa Adat.
 2. Panyarikan Desa.
 3. Sedahan Desa.
 4. Saya Desa / Kasinoman Desa.
- (2) Banjar Adat kaenter olih Kelihan Banjar Adat kasarengin olih :
 1. Panyarikan Banjar.
 2. Sedahan Banjar.
- (3) Tempekan / patus kaenter olih Kelihan Tempek miwah Kasinoman.
- (4) Sahanan Kelihan Desa Adat mawiwit sakeng karma ngarep, sakidiknia uning tata cara adat agama, tur uning panglokika miwah kaadegang malarapan antuk sesudian olih krama desa nyabran 5 (limang) warsa. Sajawaning parindikan sewos kengin kasudi malih, tur maduluran matur piuning nunas panugrahan ring Pura Kahyangan Tiga.
- (5) Tata cara ngadegang prajuru :
 1. Kelihan Desa Adat / Pangliman, Panyarikan, Sedahan kasudi olih paruman desa, katahnia kamedalang saking soang-soang banjar.
 2. Kelihan Banjar kasudi olih krama banjar adat.
 3. Kelihan Tempekan / Patus kasudi olih karma tempekan.
 4. Tan kengin nyudi karma sane tan rawuh ring paruman.

Pawos 15.

- (1) Kelian Desa Adat kasanggra olih :
 1. Panyarikan Desa, pinaka juru surat (likita).
 2. Sedahan (Patengen) pinaka pangamong druen desa.

3. Kelihan Banjar Adat, soang-soang banjar.
 4. Kelihan Tempek / Patus soang-soang tempek.
 5. Kasinoman pinaka juru pamargi.
- (2) Wewilangan panyanggra manut dudonan wibuh kancit/ agung alit miwah gegamelan.
- (3) Sajeroning ngenterang sukertan niskala Kelian Desa mingsinggihang Pamangku Kahyangan Desa.

Pawos 16.

- (1) Swadharmaning Prajuru Desa Adat luire :
1. Ngenterang palaksanaan awig-awig, paswara miwah pararem-pararem desa.
 2. Nuntun tur ngenterang karma rawuhing warga desane ngulati anut petitis, ngupadi pasukertan sekala niskala.
 3. Nuntun saha nyaksinin tata cara miwah sangaskaraning kauripan mabuat, sane ngilitang sulur pakulawargan.
 4. Nuntun saha ngenterang iwarga desa / banjar ngupadi ngelingang Sang Hyang Agama, kasucian palemahan miwah tata caraning ngangge setra.
 5. Maosang kalih niwakang pamutus marep ring wicara warga desane.
 6. Ngraksa saha midabdabin, saha nyulurang saraja brana druen desa.
 7. Ngwakilin desa matemuang bawos ring sapa sira ugi.
 8. Lan sane sewosan sane wenten paiketannia ring desa adat.
- (2) Prade I Prajuru aswadharma nilar sesana kengin kawusang tur keni pamidanda nikel ring kaiwangan ikrama manut dudonan.

Pawos 17.

- (1) Petias (olih-olihan) Prajuru luire sakadi ring sor :
1. Leluputan ayah ring desa/banjar manut pararem.
 2. Leluputan pepeson ring desa/banjar nganutin pangunadika.

3. Olih-olihan apah dasa (10%) saking hasil usaha desa kabinayang sakadi :
 - ha. Kelian Desa apah empat (25%).
 - na. Prajuru panyade/panyanggra tigang pempatan (75%) kapah maparupan nyabran warsa.

Pawos 18

- (1) Prajuru kagentosin riantukan :
 1. Kalayonan / seda.
 2. Sampun manut sengkernia.
 3. Pinunasnia mrnawita wenten sane mabuat.
 4. Kanorayang antuk ikrama desa menawita ngwetuang biuta lan saluir ipun.
- (2) Nganorayang Prajuru / ngentosin mangda sajeroning paruman tur kararemin antuk krama desa.
- (3) Prajuru sane kanorayang tan kengin kawaliang malih dados Prajuru.

Palet 3.

Indik Paruman.

Pawos 19.

- (1) Paruman ring Desa Adat Pecatu wenten 5 (limang) soroh inggih punika :
 1. Paruman desa.
 2. Paruman Banjar.
 3. Paruman Prajuru.
 4. Parum Tempekan.
 5. Paruman Sekaa Teruna lan saluir ipun.
- (2) Paruman desa kawentenang nemoning :
 1. Awarsa apisan ritepengan Ngembak Geni, masengker sajeroning awuku.
 2. Padgata kala manut kagunannia.

- (3) Paruman banjar miwah tempekan kawentenang ngenem sasih ngawit Buda Kliwon Gumbreg rawuh ke Buda Kliwon Dungulan manut pararem banjar / tempekan soang-soang.
- (4) Paruman Prajuru kawentenang padgatakala manut kawigunannia.
- (5) Paruman Sekaa Deha Teruna kawentenang padgata kala manut wiguna.

Pawos 20.

Sahanan paruman / sangkepan manut dudonan sakadi ring sor :

1. Prasida lumaksana risampun katedunin antuk sang patut ngamiletin maduluran swaran kulkul, saha busana nylempot, tur tan kengin makta gegawan sakaluire miwah patut nganutin genah, saha maduluran cane.
2. Pangawit kalaksanayang panyacah sep-sepan saha risampun nyacah dedosan.
3. Tan maren kamanggala ngarcana ring Ida Bhagawan Penyarikan, maka sarana Widhi Widana cane.
4. Pamutus kautsahayang malarapan gilik-saguluk. Yan tan parasida mangda Prajuru ngilikang baos tur mawali ngrerehang pararem krama, bilih taler tan prasida kasungkemin, raris katurang ring sang ngawawenang mawastu pidaging paruman inucap tan dados wicara ring desa.

Pawos 21.

- (1) Sajeroning paruman desa / banjar patut nyiarang pamargin ngenterang desa pamekas ring sor puniki :
 1. Munjuk lungsuring pakraman makadi ayah-ayahan, sulur artha brana druen desa miwah salanturnia.
 2. Rencana Prajuru ngeninin usaha desane kapungkur.
 3. Sahanan wicara saha pamutusnia lan saluir ipun.
- (2) Sahanan sane kasiarang ring ajeng kamiletin saha katiwakin pamutus antuk paruman.

- (3) Pamutus paruman desa / banjar sinanggeh saha pamitegep palaksananan awig-awig.

Pawos 22.

- (1) Paruman Prajuru patut :
1. Kawentenang ngenem sasih apisan, bilih-bilih ngasasih, lan padgata kala manut kawigunannia.
 2. Kasarengin antuk Prajuru desa / banjar saha pamucuk-pamucuk ring desa adat.
 3. Katuntun olih sinalih tunggil Prajuru Desa Adat Pecatu.
- (2) Paruman Prajuru Desa wantah ngrincikang tata upaya nglaksanayang usaha miwah pangrencana sakadi ring sor :
1. Wewangunan ring desa adat sane kadrueang olih Desa Adat Pecatu.
 2. Pawangunan Pura Kahyangan Desa, miwah Sad Kahyangan muwah raruntutannia sane dados tetegenan Desa Adat Pecatu.
 3. Margi-margi kasangkreb antuk Desa Adat Pecatu.
 4. Ngatur palaba desa.
 5. Miara tlanjakan-tlanjakan Desa Adat Pecatu.
 6. Miwah pawangunan tiosan manut linging tatwa agama.
- (3) Pamutus sahanan rancangan bilih-bilih rancana sane pacang niwakin tetegenan ring ikrama Desa Adat Pecatu, tan patut kalaksanayang sadereng kapikukuhang antuk pararem desa/banjar manut dudonan.
- (4) Pamutus paruman Prajuru sane mawit pituduh sang mawang Rat utawi ngonekang ikrama sinanggeh pararem Desa Adat Pecatu.

Pawos 23.

- (1) Pasangkepan Daha Teruna kawentenang sanistania ngenem sasih utawi padgata kala manut tetujon miwah kawigunannia soang-soang.

- (2) Nangken sangkepan sekaa patut atur supeksa riin ring Prajuru Desa / Banjar prasida tan lempas kadi petitis pawos 3 (tiga) ring ajeng.
- (3) Pasangkepan punika patut nganutin pituduh-pituduh Prajuru Desa / Banjar.
- (4) Pamutus pararem patut karawuhang maring Prajuru Desa / Banjar, sanistania 3 (tigang) rahina sesampune ngwentenang pasangkepan.

Palet 4.

Indik Kulkul.

Pawos 24.

- (1) Kulkul ring Desa Adat Pecatu wenten 4 (petang) soroh :
 1. Kulkul desa, magenah ring jaba Pura Parerepan.
 2. Kulkul banjar megenah ring banjar soang-soang.
 3. Kulkul tempekan megenah ring soang-soang tempekan.
 4. Kulkul sekaa megenah ring soang-soang sekaa.
- (2) Tabuh tetepakan kulkul desa, banjar, tempekan muang sekaa pastika masiosan tetujon luire :
 1. Kulkul desa :
 - a. Tetangeran wali utawi patirtan ring pura-pura, tetepake banban, suara dungding (nyepangin) ritatkala pamargan Ida Bhatara muang ngrupuk suaran kulkul nulud nyepangin.
 - na. Tangerang wangsit pacang makumpul utawi paruman desa adat suarannia banban nyibakin kasambung antuk kulkul banjar.
 - ca. Tangerang kapanca baya luire :
 - Genibaya, bulus tanpepegatan.
 - Arta bayu (kamalingan) bulus tigang tulud.
 - Yening wenten jadm ngamuk, bulus mawali-wali kasawurin antuk kulkul-kulkul banjar.

Riwusan kulkul bulus, yen wenten suaran kulkul alon cihnan pakaryan sampun puput.

ra. Tangerang surya / bulan kapangan, ketug lindu, ngempang duang sibak.

2. Kulkul banjar :

a. Tangerang wali / patirtan ring pura banjar suarane nuang tit.

na. Tangerang wangsit pacang makumpul utawi paruman krama banjar miwah tedun ngayah suarane banban nyibakin.

3. Kulkul Tempekan :

a. Tangerang yen wenten sinalih tunggil warga Banjar Tempekan kalayonan / lina, tabuh kulkul nulud ping tiga, dabdab megat-megat laminnia apenginangan.

na. Tangerang tedun ngayah miwah parum swarannia nulud panjang megat-megat nulud.

4. Kulkul Sekaa-sekaa :

Tetabuhan manut dudonan sekaa soang-soang tan kengin nyamenin tabuh tetepak kulkul ring ajeng.

Pawos 25.

- (1) Kulkul Desa Adat Pecatu madrue pamangku turun temurun manut waris, tan wenang katepak olih jadma siosan sajawaning wenten panugrahan Jro Mangku kulkul inucap. Kulkul desa/banjar tan wenang katepak yening tan sangkaning pituduh Prajuru, sajawaning tetengeran panca baya manut ring ajeng.
- (2) Sang nepak tan sangkaning pituduh, patut gelis atur sepekse kabuatan panepaka. Yan tan sapunika kadanda manut pararem. Asapunika taler pamidandane yan nepak tan manut wiguna.
- (3) Prade wenten jadma nepak kulkul anut tetangeran kapanca baya, mawastu ngamedalang krama, nanging sujatinnya tan wenten kapanca baya wenang sang nepak kadanda, manut genah kulkul sane katepak, makadi ring sor :

1. Kulkul desa, kadanda 75 kilogram beras, sami ngranjing ka desa.
2. Kulkul banjar, kadanda 50 kilogram beras (20 kilogram ka desa, 30 kilogram ka banjar).
3. Kulkul tempekan/ sekaa, 25 kilogram beras (10 kilogram ka desa, 15 kilogram ka tempekan/sekaa).

Pawos 26.

- (1) Sahanan kulkul banjar/ tempekan ring wewidangan Desa Adat Pecatu patut katepak prade wenten sinalih tunggil kulkul banjar/tempekan sajeroning wewengkon Desa Adat Pecatu nyihnayang tetangeran panca braya.
- (2) Tetangeran kapanca baya patut katedunin antuk sahanan ayahan saha gegawan anut rupan baya punika.
- (3) Kulkul sekaa tan wenang nyaurin utawi nyamenin sukat miwah tetangeran kulkul desa/banjar lan tempekan. Prade kapurug patut keni danda manut pararem.

Palet 5.

Indik Druen Desa

Pawos 27.

Padruen Desa Adat Pecatu kadi ring sor :

- (1) Kahyangan desa utawi Kahyangan Tiga luire :

1. Pura Puseh muang Pura Sari.
2. Pura Desa .
3. Pura Dalem (Panataran).
4. Pura Kahyangan.
5. Pura Ulundanu (Bangbang Kembar).
6. Pura Ulun Setra (Prajapati).

Lan sakaluir busanannia.

(2) Tanah palaba Pura Kahyangan Desa/Kahyangan Tiga luire :

1. Pipil No. 131a, Klas II, linggahnia 0,705 hektar magenah ring klasiran Biduk, Desa Pecatu.
2. Bangbang klas III, linggahnia 0,170 hektar magenah ring klasiran Sema Desa Adat Pecatu.
3. Bangbang klas II, linggahnia 1,505 hektar magenah ring klasiran Sema Desa Adat Pecatu.
4. Wewidangan Setra linggahnia 1,380 hektar magenah ring klasiran Sema Desa Pecatu.
5. Panukar (silur) genah wewangunan Gedung SD No.1 Pecatu linggahnia 0,200 hektar magenah ring desa Kuta.
6. Panukar (silur) genah wewangunan Gedung SD No.3 Pecatu linggahnia 0,200 hektar magenah ring banjar Mumbul.
7. Panukar (silur) genah wewangunan Gedung SD No.3 Pecatu linggahnia 0,200 hektar magenah ring Desa Ungasan.
8. Pakarangan tegak umah Krama Desa Adat Pecatu (PKD) linggahnia 10,000 hektar magenah ring Desa.

(3) Setra apalemahan magenah ring kekuwub tanah angka 4 ring ajeng kabinayang dados 4 (petang) palih makadi :

1. Setra wong rare, during kepus udel kantos 42 rahina.
2. Setra wong rare, kanton magelang.
3. Setra wong rare, dereng maketus untuk.
4. Setra wong tua, salangkungan ring sampun maketus.

(4) Pakarangan Desa (PKD) mari teges :

1. Tan dados kadrue niri-niri utawi kaadol muang kawarisang ring anak sewos.

2. Karang Desa (PKD) wantah anggen tegak umah olih krama sampun saking nguni turun temurun kaguna kuasayang.
 3. Krama sane ngamong karang Desa manut wates-watesnia tan kengin nglah-lah.
 4. Karang Desa sane tuang tan dados kawangunin olih sapa sira ugi sajawaning sampun kararemin antuk krama desa, tur kawigunayang manut petitis mawastu tan ngawenang kapocolan.
- (5) Tanah kekeran, tanah tegal sane tan kadrue antuk warga Desa wantah dados patilikan Desa Adat luire :
1. Genah nganyut sekah utawi bukur.
 2. Kekeran Palemahan Pura Uluwatu.
 3. Kekeran Palemahan Pura Kulat.
 4. Kekeran Palemahan Pura Pangleburan Labuansait.
 5. Kekeran ring paempatan Sakapa (Tugu pangayengan Pura Pangleburan).
 6. Kekeran magenah ring Pamutih.
 7. Kekeran tanah-tanah ngampan sajabag Desa Pecatu.
- (6) Sahanan tanah kekeran inucap ring ajeng kasungguh ngukuhang kasucian muah katengetan Pura prasida tan kengin kagarap dados abian lan kawangunin, sajawaning sampun kararemin antuk krama Desa lan sang mawang rat, saha upakara sepatutnia manut Agama Hindu. Wantah prasida kangkat katanemin taru pepayonan gumana kamanggehang alas paneduh jagat.
- (7) Piranti-piranti Desa inggih punika wewangunan sane wenten ring sajeroning Pura nanging boya palinggih Ida Batara luire :
1. Mundak lan bale gong ring Pura Puseh.
 2. Bale Agung lan bale gong ring Pura Desa.
 3. Mundak lan bale gong ring Pura Dalem.
 4. Mundak ring Pura Kahyangan.
 5. Mundak ring Pura Ulundanu (Bangbang).
 6. Bale gede ring Pura Selonding.

7. Wantilan ring Pura Parerepan.
 8. Mundak ring Pura Parerepan
 9. Bale gong ring Pura Parerepan.
- (8) Gong gede abarung, mawiwit sakeng druen Ida Batara Pura Luwur Uluwatu kakuasayang antuk desa karempnin muah kabeayanin antuk daging (jinah) olih sekaa gumanti jangkep mawasta abarung. Kawigunan lan pamitegepnia makadi :
1. Manut kawigunan Desa Adat.
 2. Olih sekaa kangkat kautsahayang.
 3. Prade wenten sekaa mararian tan dados nunas pah-pahan.
 4. Gong punika kapiara olih desa sareng sekaa.

Pawos 28.

Druen Pura Sad Kahyangan.

- (1) Pura Sad Kahyangan magenah ring wewengkon Desa Adat Pecatu, madrue tanah palaba manut catetan sakadi inucap ring sor :
1. Dp. Pura Luwur Uluwatu sane magenah ring wewidangan Desa Adat Pecatu linggahnia 139,115 hektar.
 2. Dp. Pura Luwur Uluwatu sane megenah ring wewidangan Desa Adat Jimbaran malinggah 2,746 hektar.
 3. Dp. Marupa sawah magenah ring siosan Desa Adat Pecatu malinggah 6,750 hektar.
 4. Dp. Pura Jurit No.127, persil No. 8a, Klas II magenah ring wewidangan Desa Adat Pecatu linggahnia 1,205 hektar.
 5. Dp. No. 82, klas III, ring Desa Adat Jimbaran linggahnia 1,300 hektar.

Pawos 29.

- (1) Kawigunan tanah palaba Pura Sad Kahyangan lan Kahyangan Desa, pamupon muah pamikolihnia kagunayang anggen macikang Pura-Pura muang prabea upakara lan saluirnia saha makakirangannia ikrama patut ngurunia manut pararem.
- (2) Tanah palaba Druen Pura Sad Kahyangan lan Kahyangan Desa tan kengin kaadol katukar utawi kagadeang, sajawaning sampun kararemin antuk ikrama desa, utawi kagunayang manut petitis Pawos 3.

Pawos 30.

- (1) Druen Pura Sad Kahyangan sane wenten ring wewidangan Desa Adat Pecatu, kaenter olih pangempon muang pangemong / panyiwi makadi luirnia :
 1. Desa Adat Pecatu kabawos pangenong / panyiwi.
 2. Puri Agung Jro Kuta kabawos pangempon.
 3. Puri Anom Jambe Celagigendong kabawos pangempon.
- (2) Nyabran paruman / padamuan desa, Sedahan, Penyarikan patut nyiarang pandidikan munjuk lungsuring druen desa antuk ilikita pastika.

Palet 6.

Sukerta Pamitegep

Kaping 1.

Karang lan Tanah Tegal.

Pawos 31.

- (1) Krama sane ngamong tanah karang apelebahan patut ngwatesin karang inucap antuk tembok, pinih utama sane marep kamargi agung miwah rurung mangda kanten asri.
- (2) Wates karang magegaleng ka ulon, sisi kangin miwah kaler patut kakaryanin antuk sang nglinggihin / madrue karang.

- (3) Prade karasayang nglikadin wates tembok / pageh, yening pada arsa pangadinnia kengin watese nganggen pinget kemanten.
- (4) Sapunika taler yening wenten karang kabebeng, mangda kautsahayang wenten pamarginia.

Pawos 32.

- (1) Sinalih tunggil krama desa / banjar tan kalugra :
 1. Nglah-lah karang / tegal, pelaba pura, margi, tegal miwah kekeran.
 2. Ngalah-lah tanah tegak kahyangan, setra lan saluir ipun.
 3. Ngembahang toya wit saking badan wewalungan, pasiraman / kakus, pawaregan, lan saluir ipun, kapakarangan kapaumahan anak lian utawi kamargine.
 4. Ngentungang / ngutang wangken manuk / wewalungan katukade, kapekarangan utawi kategale, tegesnia wangke inucap patut katunjel tur katanem.
 5. Ngutang luhu ring margi-margi agung muang jlingjingan.
- (2) Prade wenten sakadi ring ajeng 1 keni pamidanda :
 1. Ngwaliang sane kalah-lah miwah keni danda manut pararem.
 2. Sajaba danda kadi dandaning wiwit 1 ring ajeng maweweh panyangaskara tanah kahyangan sane kalah-lah.
 3. Patut nyampetin utawi ngaryanin pamargin toya sumeken.
 4. Wangke mati sangkaning penyakit grubug / sasab, sang ngutang kadanda manut pararem.
 5. Sang ngutang luhu ring margi agung kadanda manut pararem.

Kaping 2.

Pepayonan

Pawos 34.

- (1) Ngawit namen pepayonan wiwit taru tanem tuwuh patut adepa agung ngajeroang saking wates (pagehan).
- (2) Tan kalugra wit taru :
 1. Mentik sajeroning wates (pagehan).
 2. Nglintangin wates, bilih-bilih mawastu mayanin kapisaga.
- (3) Prade wenten anut (2) kengin kawarah antuk pangadinnia tur kasadokang ring Prajuru mangda matuduhin sang nruweang wit, ngrebah taru inucap.

Yening sampun jantos ping tiga nyadokang ring iprajuru taler during karebah kengin sang nyadokang ngrebah taru inucap, kasaksi antuk iprajuru tur kapinaro tiga, asiki katur ring iprajuru, sisannia kabagi antuk sang madrebe wates.
- (4) Prade wenten sinanggeh mayanin, sang kajerihang patut atur supeksa ring Prajuru tur risampun kaparitasas, mituduhin sang nruenang wit munggul utawi sanistane nyepat gantungin.
- (5) Sane keni pamidanda panyangaskara wewangunan sane karubuhin, saha prabea manut pararem :
 1. Sang nruenang wit sinanggeh mayanin ngrubuhin wewangunan jadma tios.
 2. Sang notor, munggul utawi ngrebah, prade pungkut ngrubuhin wewangunan jadma tios.
 3. Panyangaskara inucap sanistane prascita jangkep tur mecikang sane karusak.
- (6) Krama Desa patut ngamanggehang kawerdian tanem tuwuh sane ngawinang desane asri tur lestari. Tur ninutin nanem taru pepayoman sane mawerat dados tetedan wewalungan.

Kaping 3.

Wewangunan.

Pawos 35.

- (1) Wewangunan patut :
 1. Ngangge asta bhumi miwah gegulak asta kosala kosali sanistane manut ring petitis ring niskala.
 2. Tan yogya nyayubin kapisaga.
- (2) Prade wenten sakadi angka 2 ring ajeng, risampun kasadokang ring Prajuru keni pamidanda manut pararem.
- (3) Prade wewangunan ring tepi-siringing wates patut kawentenang paiguman ring pangadinnia tur masadok ring Prajuru Banjar lan Desa. Yan mamurug, riwekas prade kawarah antuk pangadinnia, sang madrue wangunan patut ngubar wewangunan punika, saha tan polih prabea kapocolan.
- (4) Dados ngwangun ring tepi-siringing wates, yen sampun polih paiguman saking pangadinnia, tur patut nganggen abangan tur cap-capannia tiba kajero.
- (5) Krama sane pacang ngwangun patut masadok ring Prajuru, sadurung polih wawakan Prajuru dereng dados ngwangun.
- (6) Pawangunan dimel mangda nganutun Tri Mandala turing paumahan maprateka sawa.

Kaping 4.

Wewalungan.

Pawos 36.

- (1) Sahanan warga desa sane miara sakaluring wewalungan patut sayaga nitenin negul utawi mada (ngaryanang bada) wewalungan inucap, mangda tan ngrusak karang utawi pabianan krama sios, bilih-bilih jantos ngranjing ngletihin Kahyangan.
- (2) Prade wenten kadi ring ajeng, sang katiben patut mlungguhang ring sang madrebe wewalungan, ngalantur nyadokang ring Prajuru Desa mangda katiwakang pamidanda sakadi ring sor :

1. Ngwaliang wit sane karusak miwah prabea kapocolan, yening wewalungan ngeleb ngrusak tetanduran, genah sane suci.
 2. Caru Eka Sato, yening wewalungan ngrusak kahyangan muah genah suci, masengker salamin ipun tigang rahina.
 3. Kapidanda sapangargan 10 kilogram beras, lan sane ngangon kapidanda sapangargan 5 kilogram beras, kaambil antuk Prajuru Desa sane rumawos.
- (3) Krama Desa patut nyanggra wewalungan miwah sarwa prani sane mabuat. Tan patut ngamademang paksi miwah nuba ulam miwah sane siosan.

Pawos 37

- (1) Tan kawenang ngangon ring :
1. Palemahan Pura Kahyangan Tiga (Pura Desa, Puseh, Dalem lan Setra).
 2. Ring margi-margi agung muah kekeran sane wenten.
 3. Ring tegal pangangonan krama sane siosan.
- (2) Prade wenten sakadi inucap ring ajeng 1, kadanda manut pararem, saha kadulurin caru prade ngangon ring genah suci ring ajeng.

Pawos 38

Tata caraning naban wewalungan :

- (1) Prade kacunduk wewalungan ngrusak tur tan wenten mariangken nruenang, wenang kataban antuk sang katiba.
- (2) Sapa sira ugi sane polih naban wewalungan punika patut :
1. Masadok ring Prajuru Desa / Banjar, tur Iprajuru Desa / Banjar nureksa wewalungan punika.
 2. Nyawenin wewalungan inucap.
 3. Yen mamurug kecaping 1 miwah 2 ring ajeng tan polih prabea kapocolan saking sang nruenang wewalungan inucap.

(3) Sang madrebe wewalungan patut :

1. Naur prabea ring sang polih naban manut panglokika Prajuru Desa / Banjar.
2. Naur prabea ring banjar, agung arta sadaweg wewalungan inucap ical, manut pararem.
3. Prabea inucap kepah : asiki ka desa ka banjar, asiki ka sang polih naban.

(4) Sang naban manut kadi ring sor :

1. Sasampune 15 rahina pasadoke ring Prajuru, taler tan wenten mariangken wewalungan inucap, kasadokang malih ring sang mawang rat (Pemerintah).
2. Sasampune 21 rahina taler tan wenten sane mariangken wewalungan-wewalungan inucap dados kaadol.
3. Yening ngadol utawi matungang, tur wenten muktiang, keni pamidanda gung arta pangangan wewalungan. Mantuk ring sang madrebe taler kadanda apah empat katur ring banjar sang naban.

Kaping 5.

Baya.

Pawos 39.

(1) Pari indik baya wenten bacakan panca baya luire :

1. Jiwa baya, kapet patinnia makadi kabaak, kakaninin, lan saluir ipun.
2. Artu baya, kapandangan / kamalingan.
3. Geni baya, katunuan upami umah puun.
4. Er baya, anyudang embah, anyudang ombak segara, kelem ring segara.
5. Dura cara ring agama.

- (2) Sang ngamanggihin kahanan jiwa baya, patut nepak kulkul pamitulung antuk pawos 24 angka (2), 3. Tur sang mayanin keni pamidandan pangupa kara sakadi sakala niskala, makadi prabea “patiba jampi” saha niskalane keni panyangaskara manut agung alit panca baya, tur patut kasukserahang ring sang mawang rat.
- (3) Sang manggihin sahanan arta baya, patut ngulkul pamitulung anut pawos 24 angka (2), 3 tur sang kapandungan atur supeksa ring Prajuru sane pacang nibakang saha niwakin pamutus arep ring dustane :
1. Sajawaning nunasang ring sang ngawawenang taler pamidandane mangda kanutang ring undang-undang negarane (KUHP) saha ngwaliang barang.
 2. Pamidanda nikel yening taler mamaling lintangan ring apisan.
 3. Maweweh panyangaskara sanistane prayascita jangkep prade ngamaling barang sinanggeh suci.

Pawos 40.

- (1) Sang mamanggih wenten katunuan utawi blabran / anyudang embah lan saluir ipun, patut ngulkul manut pawos 24, (2), 3 miwah katedunin antuk sahanan ayahan saha gegawan anut pawos 26 (2).
- (2) Sang dura cara ring agama macihna Tri Pramana (saksi, ilikita, bukti) wenang sang inucap keni danda manut pararem, saha panyangaskara prayascita jangkep sanistane.

Kaping 6.

Panyangaskara Banjar.

Pawos 41.

- (1) Rikala nangun yajnya suka duka, kengin nunas panyanggra banjar manut ring banjarnia soang-soang.
- (2) Panyanggran banjar sane kamargiang manut dresta miwah pararem banjarnia soang-soang manut panglokika agung alit karya, tur mangda katuriksanin olih Prajuru Desa.

SARGA IV.

SUKERTA TATA AGAMA.

Palet 1.

Indik Dewa Yajnya.

Pawos 42.

(1) Palinggih panyiwian wewidangan Desa Adat Pecatu luire :

1. Kahyangan Desa manut paos 27 (1).
2. Sad Kahyangan lan eedannia luire :
 - a. Pura Luwur Uluwatu
 - na. Pura Bajurit.
 - ca. Pura Parerepan.
 - ra. Pura Kulat.
 - ka. Pura Dalem Selonding.
 - da. Pura Dalem Pangleburan.
3. Pura Dadia/Paibon/Pamaksan miwah sanggah soang-soang karma desa.

(2) Pura Sad Kahyangan lan eedannia kaetang manut petangan kuna dresta sakadi inucap ring sor :

1. Pangemong Pura Sad Kahyangan ring ajeng aksara a, na, ca ra, ka, da Desa Adat Pecatu.
2. Pangemong Pura Sad Kahyangan aksara a (Pura Luwur Uluwatu), Puri Jero Kuta Badung.
3. Pangemong Pura aksara na (Pura Bajurit), Puri Anom Jambe Celagigendong Badung.
4. Parhyangan ring Banjar-banjar kaetang olih karma banjar soang-soang.

(3) Rahina panumayan patirtan/piodalan ring soang-soang Kahyangan inucap sakadi ring sor :

1. Pura Sad Kahyangan lan eedannia:

- na. Pura Bajurit : Ngenem sasih ring rahina Anggara Kliwon Uku Medangsia.
- ca. Pura Parerepan : Ngenem sasih ring rahina Anggara Kliwon Uku Medangsia.
- ra. Pura Kulat : Ngenem sasih ring rahina Anggara Kliwon wuku Medangsia.
- ka. Pura Dalem Selonding : Ngawarsa ring sasih Karo nemu Buda Wage.
- da. Pura Pangleburan : Ngenem sasih ring rahina Saniscara Kliwon wuku Kuningan.

2. Pura Kahyangan Desa luire :

- a. Pura Puseh : Ngenem sasih ring rahina Sukra Paing wuku ‘Dungulan.
- na. Pura Desa : Ngenem sasih ring rahina Saniscara Pon wuku Dungulan.
- ca. Pura Dalem : Ngenem sasih ring rahina Anggara Kliwon wuku Tambir.
- ra. Pura Kahyangan : Ngenem sasih ring rahina Anggara Kliwon wuku Tambir.
- ka. Pura Prajapati : Ngenem sasih ring rahina Waraspati Wage wuku Sungsang.
- da. Pura Bangbang : Ngenem sasih ring rahina Soma Pon wuku Sinta.
- ta. Pura Sari / Melanting : Ngenem sasih ring rahina Sukra Paing wuku Dungulan.

3. Tugu-tugu Pangayengan :

- a. Tugu ring Kantor Kepala Desa karangkus upakarania ring aksara 2.a.
- na. Tugu ring Bank Desa karangkus ring aksara 2.na.

- ca. Tugu ring Pempatan Desa, Durga karangkus ring aksara 2.ca.
- ra. Tugu Tegal Panangsaran karangkus ring aksara 2.ra.
- ka. Tugu Pempatan Sakapa karangkus ring aksara 1.da.
- 4. Pangaci ring Pura Kahyangan Desa, Pura Sad Kahyangan lan eedannia nista, madia, utama nganutin kewentenan lan pararen, nitegepin pangaci kamedalang antuk Krama Desa.

Pawos 43.

- (1) Ring soang-soang pura inucap ring ajeng kawentenang Pamangku.
- (2) Ngadegang Pamangku manut dudonan.
 - 1. Nyanjan / nedunang nunas pawuwus Widhi utawi pepingitan.
 - 2. Warisan Pamangku turun temurun.
 - 3. Pilihan Krama Desa manut pararem.
- (3) Sane tan wenang angge Pamangku :
 - 1. Cedangga, luire : peceng, perot, cungh, lan saluir ipun.
 - 2. Kageringan luire : sakit ila, ayan, buduh lan saluirnia.
 - 3. Muah sane lian-lianan manut pararem.
- (4) Prabea ngawentenang Pamangku Sad Kahyangan / Kahyangan Desa sane wenten ring wewidangan Desa Adat Pecatu lanang istri kamedalin antuk krama desa, miwah rikala kapatiannia riwekas, mangda kapitra yajnya sanistane nyawasta gni ring kulawargania, Krama Desa nyanggra antuk pepatusan. Soang-soang 150 kilogram beras, 75 bungkul kelapa, 75 adeng katurunin antuk Krama Banjar.

Pawos 44.

- (1) Tetegenan Pamangku Kahyangan Desa, soang-soang sakadi ring sor :
- (2) Ngaryanin aturan pangaci nemonin Purnama Tilem, Kajeng Kliwon lan saluir ipun.

- (3) Ngraksa saha miara pralingga miwah ubon-ubon/ panggangge pura soang-soang.
- (4) Nyadokang ring prajuru prade wenten panganggo pura sane rusak, Prajuru Desa patut ngentosin manut panglokika.
- (5) Tetegenan inucap polih prabea sakeng desa nangken nganem sasih manut dudonan.

Pawos 45.

- (1) Swadharmaning Pamangku :
 1. Ngenterang upacara-upacara piodalan ring Kahyangan Desa utawi ring soang-soang pakubonan krama desa.
 2. Ngaturang panauran-panauran sinalih tunggil Krama Desa (warga dura desa).
 3. Nitelin, nuntun kasucian kahyangan.
- (2) Sang mapanauran patut masadok ring Prajuru mangda kailikitayang tur kaunggahang drue desa luire :
 1. Panauran upacara-upacara lan wawaban (balih-balihan).
 2. Panawuran leluwes, mule-mule lan saluirlia.
 3. Sesari-sesari lan saluirlia
- (3) Muputang yajnya nista miwah madya olih pamangku Gede, yening utama kengin nuur sang Sulinggih pacang muput piodalan inucap lan Pamangku maka panyanggra.
- (4) Pamangku Kahyangan Desa kengin :
 1. Nibakang panugrahan ring mangku sanak, auban lan Krama Desa manut pararem.
 2. Polih panampa rikala ngamargiang pujawali, saking warga dane mangku, juru canang, mangku auban miwah rikala wenten cuntaka saking wargan Mangku Kahyangan seda.
 3. Polih panyepuhan prade katiwakin antuk sinalih tunggil krama yening yukti tan wenten kaiwangan, sakewanten prade mabukti kaiwangannia patut nyepuhin raga antuk prabea ngraga.

Pawos 46.

Pikolih (patias) Pamangku/Sang Sulinggih :

1. Sarin canang, sarin panauran lan saluirnia.
2. Luput ayah muah reramon ring banjar/desa.
3. Sarin tahun saking krama desa/banjar sane kaatur ka Kahyangan Desa kaetang antuk Prajuru.

Pawos 47.

(1) Pamangku kagentosin riantukan :

1. Lina.
2. Pinunas ngraga menawita kageringan.
3. Kawusang menawi nilar sesana, malaksana asta dusta (anayub cor) kahukum lan saluiripun.

(2) Prade kacihnayang Pamangku malih ngalap rabi santukan balu patut mararian masengker 42 rahina, tur sampun nyuciang raga sareng rabine antuk prabea newek kasaksiang olih Prajuru.

Pawos 48.

- (1) Rikala wenten patoyan / patirtan ring pura, krama sane pedek tangkil / ngaturang ayah, patut mapangangge adat manut agama Hindu.
- (2) Rikala piodalan ring Pura Kahyangan Tiga, pamucuk ayah sajeroning wali saking banjar manut giliran.
- (3) Krama Banjar siosan patut ngebekang ngaturang pangubakti, pedek tangkil ka pura.
- (4) Prade muspa mangda tragia sarana eteh-ete.

Pawos 49.

Kasukertan kahyangan kadi ring sor :

(1) Tan kalugra ngranjing ka pura :

1. Sang kacuntakan sangkaning sebel :

a. Sebel raga luire :

ha.1. Sebel kandel (ngrajaswala) salami dereng mabersih.

ha.2. Sebel madrue oka, salami akambuhan (42 rahina).

ha.3. Sebel pangantenan salami dereng mabea kala.

ha.4. Sebel gamia-gamana, salami dereng maupakara.

ha.5. Sebel mobot tanpa purusa, salami dereng kapajatiang upakara widhi
widana, kasaksiang antuk Prajuru.

na. Sebel kapatian, kulawarga ngarep, misan, mindon salami dereng maupakara
tetebasan beakaon.

2. Makta sahanan barang sane ngletehin.

3. Sato agung / wewalungan ngranjing ka pura sajawaning rikala mapepada.

(2) Pratilaksanane sane tan wenang ring pura :

1. Masumpah (nayub cor) sajawaning pituduh Prajuru.

2. Makobetan maseneng-seneng, makoleh lanang istri dados asiki, makoratan wiadin
mabayu lan saluir ipun.

3. Mungguh tedun palinggih, sajawaning pituduh Pamangku wiadin Prajuru.

4. Ngamargiang tirta, sajawaning Pamangku, utawi mangku sanak / sulinggih.

Palet 2.

Indik Rsi Yajnya.

Pawos 50.

(1) Sang pacang mapodgala (dwijati) sajawaning nunas panugrahan ring sang rumawos
(Parisada utawi Kantor Agama Hindu) patut taler masadok ring Prajuru Desa.

- (2) Prajuru inucap patut sareng nureksain nitenin mangda sulur pamargine yukti-yukti manut kekecap Agama, makadi kacedanggan lan saluir ipun, saha sareng nyaksinin pamargin upakarane.
- (3) Sapupute Prajuru Desa patut digelis ngentosin parab sang diniksa ring sahanan ilikita, antuk biseka kawikonan manut panugrahan nabene, saha kasiarang ring paruman desa.

Pawos 51.

- (1) Sajawianing Pamangku, sang pacang mawinten saha makabuatan pacang mamargi nyonteng, dalang, sakaluir pacang ngenterang yajnya patut masadok ring Kelian Desa.
- (2) Prajuru patut ngawas tur wenang ngalengin prade kacihnan sasar ring kakecap miwah dresta. Tur sareng nyaksiang upakara, salanturnia nyiarang ring parum desa tegap rauhing wates kawenangannia ngenter yajnya.

Pawos 52.

- (1) Krama desa / banjar kantuntun antuk Prajuru sareng ngawas nitenin mangda sahanan yajnya sane kawentenang kaicen pamuput olih Pandita utawi sang sujana (Mangku, Dalang, sakaluire) manut kawenangannia soang-soang.
- (2) Prajuru patut nuntun saha ngamanggala krama Desa mikukuhin kasucian linggih para wikune, ring wewidangan Desa Adat Pecatu.
- (3) Ngaturin dana / punia manut wibuh / kancit karyane.
- (4) Sakeng sateleb mapiresep pawarah (pawisik) lan pustaka suci pakaryan ida para resi.

Palet 3.

Indik Pitra Yajnya.

Pawos 53.

Pamargin Pitra Yajnya :

- (1) Pangupakaran sang lampus :

1. Mendem utawi ngeseng makacihna pakingsan ring Ibu Pertiwi (utawi ring bhatar) salami nuptupang prabea.
 2. Atiwa-tiwa utawi upakara pangabenan tur sane kengin kaabenang ngalungah saking embas rawuh sadereng kepus untu, tur saking kepus untu rawuh mayusa lingsir patut kaabenang manut upakara sang mayusa lingsir.
- (2) Upacara-upacara pitra riwusan kaabenang mawasta upakara Pitra Pitari (nyekah / mukur).

Pawos 54.

Swadharman lan tetegenan prade wenten krama desa sinalih tunggil sane lampus :

- (1) Sang kaduhkitan :
 1. Nyadokang ring prajuru tur nunas tetimabangan ring kawentenannia.
 2. Ngaturang ring banjarnia prade kapendem utawi kaabenang.
- (2) Swadharmaning banjar / desa :
 1. Prajuru maritatas pamargin sang kaduhkitan napi pacang kapendem / kaaben.
 2. Nepak kulkul manut pawos 24 (2), angka 6 ring ajeng.
- (3) Panyanggran banjar salanturnia :
 1. Sang krama nedunang patus / tempekan manut pararem soang-soang banjar / tempekan, asapunika taler prade lantur kaabenang.
 2. Krama banjar / tempekan lanang istri ngambil pakaryan manut dresta, miwah ngrombo rikala pakutangan, saha soang-soang mabusana adat sanistane maslempot lanange, miwah masesenteng krama sane wadon.
 3. Pamargin sawa miwah upakarannia mangda dabdab antar tan kengin masuara gora (ngarap watang).
 4. Prade mamurug kadi angka 3 inucap ring ajeng, kantur ring Prajuru Desa, kakeninin pamidanda manut pararem.

(4) Prade sawane malelet :

1. Mapawanengan salami 12 rahina, pradene tan kasida sadereng panumayan inucap mangda ngwentenang pasadok ring Prajuru Banjar / Desa.
2. Mungguing pagebagan manut petangan Prajuru Banjar soang-soang.

Pawos 55.

Pamendemane patut kadi ring sor :

(1) Nganutin dewasa saha pakiriman kalaksanayang ngawit mendem rauh tigang rahina, sakewanten tan kalugra mendem :

1. Rikala Purnama, Tilem, rerainan gumi.
2. Rikala Bhatara Kahyangan Desa lan Sad Kahyangan ngadeg / nyejer.

(2) Nganutin genah ring setra :

1. Wong rare mayusa dereng asambutan (tigang sasih) paling teben.
2. Wong rare mayusa asambutan rawuh tigang woton, ring setra magelang.
3. Wong rare mayusa lintangan ring tigang oton rauh ketus untu ring setra madya.
4. Sane langkung ring ketus untu ngantos lingsir magenah ring ulon.

(3) Kalugrayang mendem manut petangan :

1. Wong rare durung kepus untu, patut kapendem pramangkin tan ngetangin padewasan.
2. Wong rare durung kepus untu, kalugra mendem ngawit saking semeng, sakewanten sane sampun ketus untu ngantos lingsir patut mendem nyoreang (saking dauh pat).
3. Pamendeman rikala piodalan sane kabaos galah dadi nganutin tata cara sane sampun mamargi.

(4) Mapendem tan nganutin dewasa sane kabaos galah makingsan tan kalugra ngurugin gumanti ngantos padewasan, upakara mamargi sapatutnia.

(5) Yening wenten sang tios desa mapendem iriki kakeninin pananjung batu mawerat 500 jinah bolong utawi beras (manut pararem prajuru), saha upakara sapatutnia manut agama Hindu.

- (6) Yening matempung ngaben, soang-soang sawa kakenin pananjung batu mawerat 250 jinah bolong utawi manut pararem prajuru.

Pawos 56.

- (1) Prade lampus sangkaning salah pati, werat pati, kabangawan lan sahanan ipun, kengin kabakta budal tur kapratekaka di patut, risampun kamanggala antuk upakara/upacara banten panebusin lan pangulapan.
- (2) Sang lampus sangkaning sakit ila, gering agung lan saluirnia risampun kaupakara manut (1) ring ajeng kengin kapendem ring setra ageng.
- (3) Prade wenten sinalih tunggil krama ngerobang kulawarga manut (2) ring ajeng, sadereng sang kageringan lampus patut digelis kasadokang ring Prajuru muah mapatiba jampi usada dokter. Yen mamurug gering inucap nglahlahin, sang ngerobang kadandan manut pararem.
- (4) Sawa daha-teruna, patut ngangge rurub putih kuning, saha prade during mapandes dados sawane katatahin rihin wawu raris kaaben utawi kapendem.
- (5) Prade sang istri lampus ngadut manic tan wenang kapendem / kaabenang sadurung bobotane embas, mawastu kajantenang rarene maurip utawi padem.
- (6) Prade kahanan wong lampus ring pakarangan, tegalan lan saluir ipun patut sang madrebe layon mrayascita genah inucap.

Pawos 57.

- (1) Mungguing kacuntakan kadi ring sor :
 1. Sangkaning pakarangan asiki, salami tigang rahina prade kapendem / ngaben pramangkin, ngawit saking mapendem ngantos tigang rahina (nglebar) buntas.
Prade atiwa-tiwa nyekah utawi ngerit ngawit saking ngulapin tigang rahina saking pangutangan, malebar (buntas).
 2. Sang madue layon, during kepus udel salami 42 rahina.

3. Sakeng sulur pakilitan pakula warga, tunggal dadia / pamrajan ngawit saking mapendem laminipun 12 rahina wawu buntas sasampun makekelud, sakewanten yan prade nangun yajnya, sawane mangda kaprateka / matirta pangentas saha makekelud sadereng 12 rahina.

(2) Tan keneng cuntaka :

1. Sang sulinggih / pandita utawi pinandita.
2. Mangku Kahyangan Desa lan Sad Kahyangan.
3. Sang angawerat.
4. Sang tri manggalaning yajnya yening sampun ngentegang beras.

Pawos 58.

(1) Atiwa-tiwa (pangabenan) wenten kalih soroh :

1. Nyawa resi (nyuasta geni).
2. Sawa prateka.

(2) Nyawa resi, kalaksanayang antuk pangawak lanang duaning tan ngagah galih (nyawang).

(3) Sawa prateka kalaksanayang ngaben malayon tan matunjel (manut dresta).

(4) Dudonan pangabenan makadi ring sor :

1. Ngaskara antuk nyawa resi.
2. Pangutangan antuk mapendem (tan kageseng).
3. Pakiriman.
4. Nyekah / mamukur.

Pawos 59.

(1) Panumayan pangabenan kalaksanayang sanistane nyabran 10 (dasa) warsa prade nyekaa utawi ngerit.

(2) Tata sulur pangabenan manut papendeman ring ajeng maweweh upakara panebas tirta sakadi ring sor :

1. Banten ka Pura Dalem, peras daksina miwah reruntutannia.
 2. Banten ka Pura Prajapati muang Kahyangan pateh sakadi ring ajeng saha sasarinnia maka buat manut lila.
 3. Prade ngaben nyekaa (ngerit) manut pararem sekaan sawa.
 4. Banten ka Beji (Bangbang) susi asoroh miwah katipat sodan.
- (3) Prade mapendem nunas toya ring Pura Dalem, Kahyangan miwah Prajapati, pamargine manut dresta.

Palet 4.

Indik Manusa Yajnya.

Pawos 60.

- (1) Manusa Yajnya inggih punika upacara-upacara dharmaning manusa, ngawit saking patemoning kama petak kalawan kama bang sajeroning garban ibiyang ngantos lampus ri wekas.
- (2) Upacara ring ajeng madudonan sakadi ring sor :
 1. Magedong-gedongan pangerempinian ibiyang (yusa bobotan 3 - 4 sasih).
 2. Duk sang kama reka / rare wawu medal.
 3. Kepus udel / puser.
 4. Nglepas aon / risampun rare mayusa 12 rahina.
 5. Akambuhan, rare mayusa abulan pitung dina (42 rahina)
 6. Tigang sasih (nyambutin).
 7. Pawetuan, risampun mayusa 6 sasih (ngotonin).
 8. Ngempugin, rikala wawu tumbuh untu.
 9. Maketus / makupak upakara sasayut pangerti suara.
 10. Ngunggah deha-teruna (ngrajaswala wadone / ngembakin yen lanang).
 11. Mepandes / matatah.
 12. Mawiwahan / madengen-dengen ring pagriastane.
 13. Mawinten nunas panugrahan Sanghyang Saraswatu.

- (3) Upacara-upacara inucap ring ajeng, nista, madya, utama nganutin sastra agama miwah catur dresta, makabuatan desa drestane ngawinayang sima cara banjar, Desa Adat Pecatu.
- (4) Upacara pawintenan inucap manut sakadi pawos ring ajeng miwah upacara pawiwahan manut pawos 64 (1) ring sor.
- (5) Upacara-upacara atiwa-tiwa manut sakadi pawos 57 miwah pawos 58 ring ajeng.

Palet 5.

Indik Bhuta Yajnya.

Pawos 61.

- (1) Bhuta yajnya inggih punika upacara-upacara ring pertiwi lan kahyangan, saha upacara ring bebhutan.
- (2) Upacara-upakara pabyakala ring sarwa prani :
 1. Tumpek Pangarah (Pangatag) nemonin saniscara Kliwon Wariga upacara majeng ring sarwa tumuwuh, saking Pura Malanting soang-soang banjar kadi ring ajeng.
 2. Tumpek Andang / Uye, nemonin saniscara Kliwon Uye, upacara majeng ring sarwa ingon-ingon.
 3. Upacara-upakara pakalan-kalan manusa manut wiguna ketah kabawos pabyakalan.
- (3) Upacara-upakara pabyakalan ring Pertiwi miwah Kahyangan lan ring bebhutan kawastanin macaru.
- (4) Pacaruan inucap ring ajeng : nista, madya, utama manut wiguna sakadi ring sor :
 1. Eka Sato antuk ayam berumbun asiki.
 2. Panca Sato.
 3. Resi Gana.
 4. Panca Kelud.

5. Panca Sanak.
 6. Tawur kasanga.
- (5) Sewosan ring ajeng kawentenang upakara Yajnya Sesa (masaiban) antuk ngejot nyabran wusan ngratengan.

Pawos 62.

- (1) Upacara-upakara ring desa kawentenang sakadi ring sor :
1. Rikalaning Tilem Kenem, upacara Ngusaba Desa, kalaksanayang ring Pura Puseh maduluran pangaci tawur :
 - ha. Nangluk mrana caru Panca Sato, panyambleh ayam selem.
 - na. Caru Eka Sato ring soang-soang Pempatan.
 - ca. Caru ring lebu soang-soang krama.
 2. Sajroning sasih Kenem pangaci ring pura-pura :
 - ha. Maturan hidangan ring Pura Kahyangan Tiga muang Sad Kahyangan.
 - na. Ida Bhatara malasti kasegara (makiis mamendak sabeh) saha upacara tawur ring Pura Desa lan Pura Pangeleburan, caru Eka Sato.
 - ca. Upacara Mamiyut ring Pura Puseh.
- (2) Tawur Kasanga kalaksanayang upacara-upakara saluurnia :
1. Pangelong ping roras / tiga welas sasih Kasanga Ida Bhatara malasti ka segara, ping tiga welas perwani Ida Bhatara ngadeg / nyejer ring Pura Desa (Bale Panjang).
 2. Prajuru Desa / Banjar ngenterang ayah-ayahan krama sane patut giliran ngiring tur ngetang sahanan daging upakara kaolah ring banjar manut giliran.
 3. Ring Tileming Kasanga upacara-upakara tawur antuk caru Panca Sato, masambel bawi belang kalung, kamargiang ring catus pata desa. Caru ring banjar Eka Sato.

4. Wusan macaru, ngrupuk (ngagobog) kacihnayang antuk suaran kulkul.
5. Ring tepengan ngrupuk, nyoreang tan kengin langkungan ring tengah latri, riantukan dauh inucap maka panampihan rahina panyepian benjangne.
6. Tata cara ngrupuk mangda mamargi trepti katureksain antuk prajuru, prade mamurug keni danda manut pararem.

Pawos 63.

(1) Upacara Brata Panyepian, manut catur pabratan makadi ring sor :

1. Amati geni, tan kengin maapi-api sawawaning :

ha. Sang madrue rare dereng tigang sasih ring genah rare inucap.

na. Sang matepetin ring genah sang sungkan.

ca. Sang madrue layon ring genah sawa.

2. Amati karya, tan wenang nyambut karya.

3. Amati lampah, tan kengin malelungayan sawawaning Pacalang Desa, Prajuru Dinas miwah sang polih wak-wakan (ijin) antuk ilikita pastika.

4. Amati lelanguan, tan kengin masuara gora, maoneng-onengan / maplalian lan saluiripun.

(2) Prade mamurug brata panyepian, keni pamidanda manut pararem kalaksanayang antuk Pacalang muang Hansip. Dedandan inucap ngranjing ring Kas Desa Adat.

(3) Riwus rahina Nyepi kawastanin Ngembak Geni, mapiteges panglukaran yoga samadi kadulurin antuk ngaksama soang-soang karma desa / banjar, maka cihna pangawit Icaka Warsa.

SARGA V.

SUKERTA TATA PAWONGAN.

Palet 1.

Indik Pawiwahan.

Pawos 64

- (1) Pawiwahan inggih punika patemoning purusa lawan pradana panunggalan kayun sukacita kadulurin upasaksi sekala lawan niskala.
- (2) Palaksanaan pawiwahan wenten 3 (tigang) soroh luire :
 1. Pepadikan, kamanggala antuk pakrunan.
 2. Ngrorod, ngrangkat riin wawu kakrunayang.
 3. Nyeburin utawi nyentana, risampun kategepin antuk upacara pajati majauman.
- (3) Pidabdab sang mawiwaha patut :
 1. Sampun manggeh daha-teruna mayusa sanistania 19 (siangolas) warsa soang-soang.
 2. Sangkaning pada arsa (tan kapaksa).
 3. Manut kacaping agama (tan gamia gamana lan saluir ipun).
 4. Prade pangambile tios agama, dandanan saking kapurusan kamenggala antuk banten panyambutan.
- (4) Pamargin pawiwahan (parabian) inucap ring ajeng mangda taler nganutin Undang-undang panagarane inggih punika U.U. No. 1 warsa 1974 PP No. 9 warsa 1975 miwah pasuara sane kamedalang antuk Gubernur Kepala Daerah Tingkat I Bali.
- (5) Sang sane mamurug kecape ring ajeng manut tripramana, patut :
 1. Tan manut kecaping (3), 2 menawi kapaksa (kaplagandang), antene kengin kapalasang antuk pasadok ring Polri, tur kadanda 100 kilogram beras, katur ka desa atenga 50 kilogram, ka banjar 25 kilogram, tur katempekan 25 kilogram. Pamidanda punika punika ngwaliang panyudamala desa.

2. Sang nyruronin (ngicen genah) antene saha tan masadok ring Prajuru Adat lan Dinas jantos 3 (tigang) rahina suwennia, keni panyruron inucap danda 25 kilogram beras, miwah sang nyarengin mlegandang kadanda 50 kilogram beras soang-soang.
3. Tan manut kecaping agama, kadanda 100 kilogram lan parabiane punika kapalasang.

Pawos 65.

(1) Parabian sane kapatut ring Desa Adat Pecatu manut kecaping Pawos 64 (1) risampun macihna :

1. Pawidhi widana, sanistane pabiakalan (madengen-dengen) lan pajati / jauman, madelokan ka sangkaning wadon saha katipat bantal.
2. Kasaksiang antuk Prajuru-prajuru Dinas lan Adat.
3. Salanturnia kaunggahang ring sajeroning pailikita tur katumusang ring sang ngawa wenang (camat), prasida polih akta perkawinan utawi ilikita patra pawiwahan.

(2) Parabian tan kapatut sakadi :

1. Natab upakara saking pepaksan.
2. Sinalih tunggil tan rauh miwah tan wenten ilikita.
3. Nenten wenten saksi miwah ilikita.

Pawos 66.

Tata caraning pawiwahan patut sakadi ring sor :

- (1) Sapasira ugi pacing ngwarangang pakula wargan patut masadok ring prajuru, sane pacing maritetes, manut tan manut kekecap pawiwahan punika.
- (2) Palaksanaan pangrorodan :

1. Reraman lanange ngwentenang pamilaku / pajati antuk duta sangkirangnia kalih diri mapramana antuk dammar (sundih), tan kasep jantos a rahina (patut wengi), sajawaning sang ngambil sios desa kengin kasepan jantos 3 (tigang) rahina.
 2. Risampun reraman wadon nrima baos sang duta patut mawali atur uninga ring rerama lanange.
 3. Yening reraman wadone tan arsa nrima pamilaku, tan kengin ngrasaning duta, patut reraman wadone inucap digelis atur supekta ring Prajuru, mungguing tata caran pawiwahan okane menawita tan patut.
 4. Prajuru nureksain indik pamargin antene ring ajeng.
 5. Prade reraman wadone ngwirangin duta, makadi angka 3 ring ajeng pragata rumaksa ngentungang okane ngrorod tanpa samawanda ring Prajuru, wong inucap mapiteges ngwirangin duta (utusan), wenang kadanda manut pararem Krama Desa.
 6. Yening tan wenten pamilaku, kengin netes (neteg) kaanter antuk Prajuru Adat / Dinas saha nganutin tata neteg.
 7. Pagenahan antene tan kengin ring pauman sang lanang sadereng mabeakala, sajawaning wadone saking dura Desa Adat Pecatu.
 8. Yening antene muah kulawarga pada arsa dados kabakta budal ring genah sang lanang wiadin wadon masengker 3 (tigang) rahina maduluran upakara mabeakala.
- (3) Sajeroning pakurenan (panglukuan) patut :
1. Kamanggala antuk geng pangampura (malaku pelih) arep ring reraman wadone.
 2. Mararasan / kaigumang bebawos sang ngidih saha dewasa pakerab kambeane riwekas.
 3. Taler kacihnayang mungguing purusa utawi sentana rajeg kajejerang, kapatutang olih prajuru, kengin ngidih anak lanang.
 4. Prade tan nrima pakrunaan kamargiang pepadikan jantos ping tiga.

(4) Pakerab kambean mapiteges upacara tinas apadang (patut) mapikuren duaning manut sakadi ring sor :

1. Sajeroning babawos “ambe” kalaksanayang ring sekala niskala antuk sarana katipat bantal jejauman miwah pawidhi widana :

ha. Jejauman punika ambe / ngadungang kayun soang-soang kulawarga wadone.

na. Widhi widana pinaka pajati niskala nunas wadone ring pamrajanian.

2. Sajeroning pakerab palaksanaan ring sekala :

a. Antuk saksi Krama Banjar duaning kasiarang mungguing kawentenan sinalih tunggil warga mawiwaha.

na. Pamekas panyaksi prajuru Desa Adat lan Dinas tur kailikitayang.

ca. Tan kapatutang makta jejauman ring dahane yening wenten kapialang.

Pawos 67.

(1) Pitegep pawiwahan patut sang lanang marabi adiri asapunika taler sawaliknia sajawaning pasubaya paitungan sios.

(2) Dados marabi langkung ring adiri yening sampun polih paiguman sadulur olih rabine sane dumunan.

(3) Prade wenten lokika sanggraha patut kasakapang saha upacara widhi widana.

(4) Prade wenten wong mamitra ngalang, sang inucap ngawenang cemer (leteh) jagat Desa Adat Pecatu wenang kasisipangsaha ngrebu ring Pura Desa, tur denda werat 50 kilogram beras, yening prasida kabuktiang manut Tripramana.

(5) Yening ngamitrain wong arabi jenek, lanang utawi istri, prasida kabuktiang manut Tripramana kadanda werat 100 kilogram beras tur ngrebu ring Pura Desa madasar antuk sumpah utawi cor.

(6) Prade wenten dratikrama muang paradara, lan saluir kasisipang danda 25 kilogram beras, saha ngrebu ring Pura Desa.

Palet 2.

Indik Nyapian.

Pawos 68.

- (1) Pawiwahan sida kawusang malarapan antuk palas marabian utawi sangkaning lina.
- (2) Wusan makurenan santukan sinalih tunggil lampus, mapiteges balu.
- (3) Palas marabian wenten sangkaning lila cita utawi wiwit wicara, prasihna tan tulus suka citaning panunggalan idep sang inucap, mapiteges “nyapian”
- (4) Sang ayat pacang palas marabian manut angka 3 ring ajeng patut atur supeksa ring sang rumawos (Pengadilan Negeri) wastu tinas apadang pamutus kabawos nyapiang nglantur Prajuru nyaksiang kawentenannia ring desa saha kadanda pamegat tali ilikita lan upacara upakara siosan manut pararem.

Pawos 69.

Tata caraning palas marabian :

- (1) Sulur palas marabi prade sinalih tunggil anyasar laku cedangga wirosaning laku, matilar tanpa sadok miwah stata wak-parusia tan prasida malih adung.
- (2) Yening wicarane katumusang antuk lanange, patut makecihna :
 1. Istrine paradara anyasar laku.
 2. Istrine amandala sanggama utawi maambul-ambulan jantos 6 (enem) sasih.
 3. Istrine cedangga / tan prasida nyanggamen.
- (3) Yening wicarane katumusang antuk wadone macihna :
 1. Lanange dratikrama.
 2. Wangdu (cedangga).
 3. Tan nyanggamen saha tan ngupa jiwa jantos 6 (enem) sasih.
- (4) Prade manut Tripramana sang mawicara inucaping ajeng angka (2), (3) patut :

1. Atur supeksa ring Pengadilan Negeri, Prajuru Desa nyaksinin manut putusing Pengadilan.
 2. Yen kapalasang, ring desa taler katiwakin pamidanda 25 kilogram beras maka panyangaskara ring Pura Kahyangan Desa.
- (5) Prade palas parabian sangkaning pada lila cita patut :
1. Naur prabea panebas pamegat tali pailikita pada matenga manut pararem.
 2. Paguna kaya polih pahan pada.
 3. Bekel / tadtadan soang-soang kakuasayang niri-niri sakawenten warisan kakuasayang antuk purusa.
 4. Ngweruhin miwah pangupa jiwain pratisentana manut swadharmaning guru rupaka.
 5. Katiwakin pamidanda manut angka (4).2.
- (6) Pamidanda panyapiian kengin kamargiang risampun katiwakin pamutus olih sang rumawos anut pawos 67 (4) ring ajeng.

Pawos 70.

Prade riwekas sang palas kacihnayang adung malih patut :

- (1) Nglaksanayang pawiwahan malih anut pawos 64 (1) ring ajeng.
- (2) Keni pamidanda saking palase yadiastun wit palas inucap sangkaning pada lila, pamargin inucap kabawos tulak wali.

Pawos 71.

(1) Balu kabinayang dados :

1. Balu luh wit sentana (rajeg) miwah balu luh boya wit sentana.
 2. Balu muani kapurusan miwah balu muani nyeburin (boya sentana).
- (2) Swadharmaning balu inucap patut :
1. Ngamanggehang Pati Brata tan ngamargiang paradara / dratikrama.

2. Ngwasayang waris pangunakarya, tan kengin ngadol, ngadeang, makidihang sadurunge polih kabebasan sking pianak utawi pakulawargane sami (prade pinake kantun alit-alit).
3. Kengin ngidih sentana prade sampun wenten pidabdab sadurung sinalih tunggil lampus saha, kabebasan antuk kaluwargane siganggeh kapurusan.
4. Kawenangang mawiwaha malih prade paiguman saking i pianak daha / teruna utawi kulawargane kapurusa, tur prasida ngupajiwain sentana.

Pawos 72.

(1) Balu kaucap tan pageh luire :

1. Dratikrama / paradara.
2. Matilar saking paumahan tanpa sadok jantos salami 6 (enem) sasih.
3. Lempas ring swadharmaning balu, tan prasida ngesehin solah maprawerti arep ring pituduh pakulawarga kapurusan.

(2) Yening macihna sakadi ring ajeng manut Tripramana, wenang balu inucap, manut linggih, balu luh boya sentana miwah balu muani nyeburin kengin :

1. Kawara antuk kulawarga kapurusan.
 2. Prade mawali budal tan polih upon waris.
- (3) Prade balu inucap pageh, katundung antuk kulawarga kapurusan patut polih pahan panguna kaya.

Palet 3.

Indik Sentana.

Pawos 73.

(1) Mungguing sentana wenten kalih soroh luire :

1. Pratisentana.
2. Sentana peperasan.

- (2) Pratisentana punika sentana sane metu saking pawiwahan.
- (3) Prade pratisentana tan patut, utawi tan manut drestaning wong alaki rabi ngametuang sentana, mangda tan kawastanin astra (panak bebinjat) kamanggala antuk sesayut panyampi.
- (4) Prade pawiwahan tan ngametuang sentana kengin ngidih sentana antuk upasaksi sekala niskala sane kawastanin sentana peparasan.
- (5) Tan kalugra ngamedalang oka dipakubon (dimel) muang mrateka sawa.
- (6) Yening wenten krama istri mobot magenah ring pondok, bobotane mayusa 5 (limang) sasih, sang mobot patut tragia magingsir kaumahnia tur mangda prasida bobotane kamedalang ring umahnia utawi ring Rumah Sakit manut dresta.
- (7) Yening wenten salah sinunggil kulawarga krama desa lampus ring pondok, patut kabakta budal kaumahnia wenang kaprateka (kabersihin), umahe sane wenten disajeroning pakraman.
- (8) Sane kasengguh umah, inggih punika :
 1. Umah sane kawangun manut pawos 35 (1) angka 1, 2 ring ajeng tur magenah ring pakraman.
 2. Pakraman magenah ring sajeroning tanah pakarangan manut sesengkernia.
 3. Tanah tegal sane wenten disajeroning palemahan-wewengkon Desa Adat Pecatu, sajaba pakraman pakarangan, kaucap dimel (pakubon), diabian.
 4. Kubu-kubu sane wenten diabian kawastanin pondok.
- (9) Prade wenten krama tan nganutin (mamurug) ucaping angka (5) ring ajeng punika :
 1. Ngupakara nyuciang desa, saha upakara manut dudonan.
 2. Digelis masadok ring prajuru desa mungguing kawentenania.
 3. Yening tan atur supeksa ring Prajuru, prade desa ewuh (durmangala), keni kacihnayang antuk Tripramana, sang kulawarga sane mamurug inucap, siosan ring nyuciang desa, keni danda manut parareman Desa Adat Pecatu.

Pawos 74.

- (1) Ngangkat sentana manut dudonan patut kacihnayang arta-barana pamerasan (panumbas basan buat) saha kasinaksiang sakala niskala.
- (2) Sapa sira ugi pacang ngidih sentana patut masadok ring Prajuru Desa Adat sanistane asasih sadereng pamerasan.
- (3) Prajuru desa patut nyiarang ring wewidangan desane, sang sapa sira ugi rumasa tan lila mangda nyadokang, masengker kalih uku sadurung pamerasan ring Prajuru Desa.
- (4) Prajuru Desa digelis mawosin saha pamutus nepek ring catur dresta miwah pararem.

Pawos 75.

- (1) Pamerasan sinaggeh patut risampun acihna :
 1. Mawidhi-widana.
 2. Kasaksiang antuk Prajuru Adat lan Dinas, saha kasiarang ring paruman banjar.
 3. Wenten ilikita, ngungguhang tata sulur pamargin pamerasan.
- (2) Sang patut kaperas anggen sentana kadi ring sor :
 1. Jadma magama Hindu.
 2. Kapernah nedunang sakeng sang meras.
 3. Kalugra sakeng purusa, yening tan wenten kengin saking wadon (pradana), prade tan wenten, wawu kengin sakeng sakama-kama.
- (3) Kengin ngangkat sentana langkungan ring adiri, lanang wadon utawi lanang-lanang.

Palet 4.

Indik Warisan.

Pawos 76.

- (1) Warisan inggih punika tetamian artha brana saha ayah-ayahan ngupadi sukerta sakala niskala sakeng kaluhurannia arep ring turunannia.

(2) Kang sinanggeh warisan luire :

1. Drue tengah makadi : bukti Pura Dadia, siwakrama pamrajan lan sakaluire.
2. Pamrajan / sanggah kamulan.
3. Wenten artha brana tetegenan / ayah-ayahan marupa warisan.

Pawos 77.

(1) Ahli waris luire :

1. Pratisentana purusa.
 2. Sentana Rajeg.
 3. Sentana peperasan lanang / wadon.
- (2) Prade tan wenten sakadi ring ajeng kang sinanggeh ahli waris : turunan purusa pernah ngunggahang, minakadi rerama misan, mindon.

Pawos 78.

Swadharmaning ahli waris patut :

- (1) Nrima saha ngwasayang tetamian pahan kaluhurannia, makadi ngremponin sanggah, pura saha pangupa-kara miwah anyledii ayah-ayahan pawaris.
- (2) Ngabenang pawaris saha nglanturang upacara ring pitra.
- (3) Naurin utang pawaris.

Pawos 79.

Pangepahan warisan sakadi ring sor :

- (1) Risampun kalaksanayang pitra yajnya lan utang-utang ring pawaris buntas katawur.
- (2) Para ahli waris polih pahan pada sangkaning pangunakayan.
- (3) Sinalih tunggil ahli waris ring ajeng kengin tan polih paha pada :
 1. Matilar (magentos) saking sangkaning ngutang tetegenan utawi dewa braya agama Hindu.

2. Alpaka guru rupaka lan guru swadiaya.
 3. Sentana rajeg kesah mawiwaha miwah pratisentana nyeburin, soang-soang kabawos ninggal kadaton.
- (4) Prade boya ahli waris kengin mupunin kewanten, anut dudonan :
1. Sentana luh salami during kesah mawiwaha utawi alpaca guru. Prade lokika sangraha mawastu madrue pianak, kengin ngwaris panguna kaya sentana luh inucap makadi biyange.
 2. Balu luh wiadin balu muani nyeburin (boya sentana).
 3. Mulih daha wiadin teruna riantuk ring pawiwahane pecak sampun kabawos ninggal kadaton.
- (5) Pawwis kengin mapaweweh rikala maurip pinaka :
1. Jiwa dana, tadtadan / bekel, maka cihna paweweh tetep ring ipianak sane kesah mawiwaha.
 2. Pangupa jiwa paweweh padgatakala pawaris maka pamupon hasil kemaon.
 3. Pedum pamong / pedum raksa, paha waris padgatakala ngantos pedum jumenek saking pawaris arep ring ahli waris.

Pawos 80.

- (1) Prade sajeroning pakulawarga wenten ahli waris langkungan ring adiri :
1. Kawentenang paiguman indik pedum waris waris inucap.
 2. Yening tan prasida kengin nunas tetimbang ring kerta desa (Kelihan Desa Adat).
 3. Prade taler tan wenten cumpu ring panepas kerta desa, kengin nunasang ring sang rumawos.
- (2) Prade wenten karang / tanah kaputungan, wenang sang Prajuru Desa maosin (nureksa sila-sila) sulur pakulawarga tur nibakang ring :
1. Ahli waris saking purusa manut pawos 76 (2).
 2. Yening tan wenten kecaping angka 1, kengin tibakang ring wadon.

3. Prade taler tan wenten inucaping angka 2 wawu kengin sakama-kama saha magama Hindu.

SARGA VI.

WICARA LAN PAMIDANDA.

Palet 1.

Indik Wicara.

Pawos 81.

- (1) Sane wenang mawosin wicara ring desa luire :
 1. Kelihan Tempek, prade sang mawicara patunggalan Tempekan Banjar Adat.
 2. Kelihan Banjar Adat, prade sang mawicara lian Tempekan tunggal Banjar Adat.
 3. Kelihan Desa Adat, prade sang mawicaramalianan bebanjaran.
- (2) Prade sang mawicara tan cumpu ring tata cara Kelihan Tempek mawosin, kengin nunas bebandingan ring Kelihan Banjar sane kasarengin antuk juru pangabihnyane makadi tetimbangan banjar jantos nedunang pararem.
- (3) Taler tan wenten cumpu ring pamatut banjar, kengin nunasang wicara inucap ring Kelihan Desa, taler kaambil antuk juru maka tetimbang sajeroning desa rawuh nedunang pakraman sajeroning sangkepan.
- (4) Taler tan wenten cumpu ring pamatut pinaka wesananing panepas ring desa, kengin nunasang wicara inucap ring sang rumawos.

Pawos 82.

- (1) Sahanan wicara mawiwit kacorahan sakaluire, miwah sinanggeh nungkasin daging awig-awig, pasuara, miwah parerem, patut pramangke kabawosin tan ngantosang pasadok.

- (2) Sajaba wicara sakadi ring ajeng patut nyantosang pasadok sang nunas bawos.
- (3) Panepase mangda pastika nyantenang iwang patut malarapan Tripramana (saksi, ilikita, bukti) saha tan maren nepek ring catur dresta.

Palet 2.

Indik Pamidanda.

Pawos 83.

- (1) Desa, banjar lan tempekan wenang niwakang pamidanda ring warga sane sisip.
- (2) Paniwak inucap kalaksanayang olih Kelihan Desa, Kelihan Banjar utawi Kelihan Tempekan nunggal manut dudonan.
- (3) Agung alit pamidanda masor singgih manut kasisipane tan maren ngupadi dharma kawelas arsan, pinih ajeng makabuatan kasudamalan desa.
- (4) Bacakan pamidanda luire :
 1. Danda arta miwah panikel-panikelnia.
 2. Danda pangampura / nyewaka.
 3. Upakara panyangaskara.
 4. Kasepe kang makrama.
- (5) Jinah utawi artha brana pamidanda ngranjing dados druen banjar / desa utawi tempekan.

Pawos 84.

- (1) Rikala pawanengan ngamedalang jinah pepeson / urunan, dedandan / dedosan yening cedok ring wewanengan, risampun polih tempo asangkepan, keni pamidanda nikel.
- (2) Risampun keni nikel, mawaneng malih kalih sangkep taler tan kataur, mawasta sang inucap tan manut sadaging awig-awig, pasuara miwah pararem desa, banjar lan tempekan, wenten kasepe kang.

(3) Pamidanda angka (2) ring ajeng keni buntas risampun sang kakeninin :

1. Nunas geng ampura / nyewaka ring krama desa, banjar / tempekan riantuk cedok, piwal ring ubaya sane kararemin pecak.
2. Naur pangargan tan nganutin awig-awig sane macihna artha brana, duk pacang kararianang.
3. Krama Desa sane kasepekang / kararianang, katrima malih dados krama desa, banjar utawi tempekan, yan sampun nganutin drestaning sakadi ring Sarga III, Palet 1, Pawos 12.

SARGA VII.

NGUAH-NGUUHIN AWIG-AWIG.

Pawos 85.

- (1) Nguah-nguuhin awig-awig Desa Adat Pecatu puniki kamargiang antuk paruman desa adat.
- (2) Parumane puniki mangda kadasarin antuk pakarsan krama desa.
- (3) Pamutus bawos mangda kadasarin antuk gilik saguluk (pararem).

Pawos 86.

Paruman indik nguah-nguuhin awig-awig ring ajeng kengin kamedalang antuk Kelihan Desa Adat, Kelihan-kelihan Banjar adat lan Kelihan Tempekan yadiastun niri-niri miwah sinarengan.

SARGA VIII.

PAMUPUT.

Pawos 87.


- (1) Awig-awig puniki kawatanin Awig-awig Desa Adat Pecatu.
- (2) Awig-awig puniki kamargiang ngawit kararemin.

Pawos 88.


- (1) Sakaluring sane wenten saderengnia kaanutang ring sadaging awig-awig puniki.
- (2) Sakaluring sane dereng kabawos sajeroning awig-awig puniki patut kalaksanayang manut tata cara sane sampun ketah mamargi kadulurin antuk pararem-pararem.

Pawos 89.

- (1) Awig-awig puniki kararemin duk rahina Buda, Kliwon wuku Gumbreg, tanggal ping 13, sasih Kalima, Isaka warsa 1909, tanggal Masehi 4 Nopember 1987, ring Desa Adat Pecatu.
- (2) Awig-awig puniki kalingga tanganin antuk Kepala Desa Adat Pecatu, kasarengin antuk Kelihan-kelihan Banjar Adat saha kasaksiang antuk Kepala-kepala Dusun sawewidangan Desa Adat Pecatu miwah Perbekel / Kepala Desa Pecatu.
- (3) Luir sang nglingga tanganin :
 1. Prajuru Desa Adat Pecatu



2. Prajuru Dinas Desa Pecatu



3. Bupati Kepala Daerah Tingkat II Badung



PAKELING

Pangripta awig-awig :

Dudonan juru pangrencana :

Luir pamidabdab :

(1). Saking Mahasiswa KKN UNUD Denpasar.

(2). Majelis Pembina Lembaga Adat :

Badan Pelaksana Pembina Lembaga Adat Kabupaten Badung lan Kecamatan Kuta

(3). Makudang-kudang pawos awig-awig luirnia :

1. Pawos : 1, 2, 3, 4, 5, 6, 7, 8, 9, 10, 11, 12, 13, sampun kapatut.

2. Pawos : 14 (1) angka 4. Saya Desa juru pamargi nglaksanayang upacara pangaci ring desa.

3. Pawos : 15, 16, 17, 18, 19, 20, 21, 22, 23, 24, 25, 26, sampun kapatut.

4. Pawos : 27 (2) angka 4, tanah inucap kaanggen tegak SD No. 1 lan SD No. 7 soang-soang 0,200 hektar.

27 (2) angka 1, tanah inucap kaanggen tegak SD No. 4 linggahnia 0,200 hektar muang lapangan sekolahan.

27 (2) angka 2 lan 3, tanah inucap kagarap olih I Nyoman Badra, I Wayan Ladhra muah I Made Jigreg, kapasewaang manut dudonan.

Tanah-tanah sane munggah ring pawos 27 (2) angka 1, 2, 3, 4, 5, 6, 7, 8, dereng malilikita sertipikat.

5. Pawos : 28 (1) catatan pakeling sane sane kabacak ring angka 1, 2, 3, 4, 5, pawos inucap keni kauah-uuhin manut kawentenannia riwekas.
6. Pawos : 30 (1) Pangenteran druen (laba) Pura Sad Kahyangan (Luwur Uluwatu lan Bajurit) sane ring Desa Adat Pecatu kaigumin manut cara (system) bagi hasil, mantuk ring sang sane ngarapin inggih punika minakadi saking pikolih pamupon 70% mantuk ring pangarap, 17,5% manuk ka Desa Adat Pecatu, 12,5% mantuk ka Pangempon.

Desa Adat / Pangempon lan Pangemong soang-soang hasil inucap kagunayang mecikang Pura muang biaya upacara-upacara lan saluiria.
7. Pawos : 31, 32, 33, 34, 35, 36, 37, 38, 39, 40, 41, 42, sampun kapatut.
8. Pawos : 42 (2) angka 2 Puri Jero Kuta ngaturang piodalan ring Pura Luwur Uluwatu, Pura Parerepan lan Kulat saha biaya panglaksanaan antuk Pemangku.

42 2) angka 3 Puri Celagigendong ngodalin ring Pura Bajurit.
9. Pawos : 43 (4) soang-soang urunan mapitra yajnya ring Pamangku sane lina kamedalin antuk banjar-banjar kapupulang ring desa, wawu katurang ring sang inucap.
10. Pawos : 44, 45, 46, 47, 48, 49, 50, 51, 52, 53, 54, 55, 56, 57, sampun kapatut.
11. Pawos : 58 (3), sawa prateka (ngaben) malayon utawi tan malayon tan dados mageseng matunjel (mamuun), wantah matirta Panembak, pinaka pangesengan riantukan wenten sulur nampek ring palinggih Pura Luwur Uluwatu manut dresta.

12. Pawos : 59, 60, 61, 62, 63, 64, 65, 66, 67, 68, 69, 70, 71, 72, 73, 74, 75, 76, 77, 78,
79, 80, 81, 82, 83, 84, 85, 86, 87, 88 lan 89 sami sampun kapatut.

Prade wenten dereng sinah prasida kangkat katureksain kabecikang tur kapatutang.